



ALL INDIA RADIO, SILCHAR

EVENING BULLETIN : BENGALI

Date: - 24-05-2024

Time: 19:45-19:55 Hrs

১। আগামীকাল দেশের ৫৮ টি লোকসভা আসনে ষষ্ঠ পর্যায়ের নির্বাচনের ভোটগ্রহণ ।

২। সপ্তম তথা অন্তিম পর্যায়ে আগামী পয়লা জুন অনুষ্ঠেয় ভোটগ্রহণের জন্য নির্বাচনী প্রচার জোড়দার ।

৩। প্রতিরক্ষা গবেষণার সঙ্গে জড়িত ব্যক্তিদের দেশের শক্তি বৃদ্ধি এবং আত্মনির্ভরশীলতার জন্য নতুন প্রযুক্তির সাহায্যে এগিয়ে যেতে প্রতিরক্ষা গবেষণা এবং উন্নয়ন সংস্থার অধ্যক্ষ ডঃ সমীর ভি কামাতের আহ্বান ।

এবং

৪। রাজ্যের বিভিন্ন সত্র নামঘরে আজ উৎসাহ ও উদ্দীপনায় মহাপুরুষ মাধবদেবের আবির্ভাব তিথি পালন ।

লোকসভা নির্বাচনের ষষ্ঠ পর্যায়ের ভোটগ্রহণের জন্য সব প্রস্তুতি সম্পূর্ণ হয়েছে । এই পর্যায়ে আগামীকাল সকাল ৭ টা থেকে সন্ধ্যা ৬ টা পর্যন্ত ৬টি রাজ্য ও দুটি কেন্দ্রীয়শাসিত অঞ্চলের মোট ৫৮ টি সংসদীয় আসনে ভোটগ্রহণ করা হবে । এই আসনগুলির মধ্যে বিহারের ৮টি , হরিয়ানার ১০টি , জম্মু-

কাশ্মীরের একটি, ঝারখন্ডের ৪ টি ,দিল্লীর ৭টি ,ওড়িশার ছটি , উত্তর প্রদেশের ১৪টি এবং পশ্চিমবঙ্গের ৮টি আসন রয়েছে । এই আসনগুলির জন্য মোট ৮৮৯ জন প্রার্থী প্রতিদ্বন্দিতায় রয়েছেন ।

এই পর্যায়ে প্রবীণ বিজেপি নেতা ধর্মেন্দ্র প্রধান ,মেনকা গান্ধী , মনোহর লাল খট্টর ,সম্মিত পাত্র ,কংগ্রেস নেতা দিপেন্দ্র সিং হুদা ,কুমারী শৈলজা , রাজ বব্বর ,সমাজবাদী পার্টি নেতা ধর্মেন্দ্র যাদব ,পি ডি পির প্রধান মেহবুবা মুফতীর ভাগ্য নির্ণয় হবে ।

লোকসভা নির্বাচনের সপ্তম তথা অন্তিম পর্যায়ের জন্য রাজনৈতিক দলসমূহের প্রচার অভিযান তুঙ্গে উঠেছে ।বিভিন্ন দলের নেতারা ভোটদাতাদের মন জয় করার জন্য আপ্রাণ চেষ্টা চালিয়ে যাচ্ছে ।বিজেপির প্রবীণ নেতা তথা প্রধানমন্ত্রী নরেন্দ্র মোদী আজ পাঞ্জাবের গুরুদাসপুর এবং জলন্ধরে দুটি র্যালীতে অংশগ্রহণ করেন ।প্রধানমন্ত্রী আজ হিমাচলপ্রদেশের মান্দি ও সিমলায় নির্বাচনী প্রচার চালান ।কেন্দ্রীয় স্বরাষ্ট্রমন্ত্রী অমিত শাহ আজ ঝারখন্ডের ডুমকা লোকসভা আসনের দলীয় প্রার্থীর হয়ে প্রচার চালান ।অন্যদিকে কংগ্রেস নেতা শচিন পাইলট আজ শ্রীআনন্দপুর সাহিব লোকসভা আসনে প্রচার চালান ।বহুজন সমাজবাদী পার্টির নেত্রী মায়াবতী আজ পাঞ্জাবের নওয়নশেহরে নির্বাচনী প্রচারে অংশগ্রহণ করেন ।কংগ্রেস সভাপতি মল্লিকার্জুন খার্গে আগামীকাল সিমলার রোহরুতে প্রচার অভিযানে অংশগ্রহণ করবেন ।কংগ্রেস নেতা রাহুল গান্ধী আগামীকাল সিমলার নাহানে একটি র্যালীতে অংশগ্রহণ করা সহ আগামী রবিবার তিনি হামিরপুর লোকসভা আসনের উনায় প্রচার অভিযানে অংশগ্রহণ করবেন ।

প্রতিরক্ষা গবেষণা ও উন্নয়ন বিভাগের সচিব ও প্রতিরক্ষা গবেষণা ও উন্নয়ন সংস্থার অধ্যক্ষ ড.সমীর ভি কামাত এবং লাইফ সায়েন্সের সঞ্চালক প্রধান ড.ইউ কে সিং গতকাল তেজপুরের প্রতিরক্ষা গবেষণা ও উন্নয়ন সংস্থা এবং প্রতিরক্ষার পরীক্ষাগার পরিদর্শন করেন । তাঁকে প্রতিরক্ষা গবেষণা পরীক্ষাগারের সঞ্চালক ড. ডি ভি কন্বোজ স্বাগত জানানো সহ পরীক্ষাগারটিতে

সম্পন্ন হওয়া বিভিন্ন পরীক্ষা সম্পর্কে অবগত করান । ভাষণ প্রসঙ্গে ড.সিং সামরিক বাহিনী যাতে প্রত্যক্ষভাবে লাভান্বিত হয় তার জন্য গবেষক ও সংশ্লিষ্ট গবেষণার সঙ্গে জড়িত শিল্পের সমন্বিত প্রয়াসের ওপর গুরুত্ব আরোপ করেন । এদিকে ডি আর ডি ওর অধ্যক্ষ ড. কামাত বিজ্ঞানী ও প্রতিরক্ষা গবেষণা পরীক্ষাগারের গবেষণার সঙ্গে জড়িত লোকদের দেশের শক্তি বৃদ্ধি ও আত্মনির্ভরশীলতার জন্য নতুন প্রযুক্তির সাহায্যে এগিয়ে যাবার আহ্বান জানান । তাঁর এই সফর দেশের নিরাপত্তা বাহিনীগুলিতে তেজপূরস্থিত প্রতিরক্ষা গবেষণাগার ও সংস্থার আধুনিক প্রযুক্তির গুরুত্বপূর্ণ অবদানের কথা প্রতিফলিত করে ।

ফিল্মস এন্ড টেলিভিশন ইনস্টিটিউট অব ইন্ডিয়া (এফ টি আই আই) পুনের ছাত্র চিদানন্দ নায়েকের নির্মাণ করা একটি চলচ্চিত্র ৭৭ তম কান চলচ্চিত্র মহোৎসবে 'লা সিনে' বিভাগে শীর্ষ সম্মান লাভ করেছে । চলচ্চিত্রটির নাম হচ্ছে 'সানফ্লাওয়ার ওয়ার দি ফাস্ট ওয়ানস টু নো' । উল্লেখ্য লা সিনে বিভাগে সমগ্র বিশ্বের ২ হাজার ২৬৩ টি চলচ্চিত্রের মধ্যে কেবল ১৮ টি চলচ্চিত্র নির্বাচিত করা হয়েছিল । এই সবকটি চলচ্চিত্র বিশ্বের বিভিন্ন শিক্ষাপ্রতিষ্ঠানের ছাত্রছাত্রীদের দ্বারা নির্মিত ।

উত্তরপূর্ব সীমান্ত রেলওয়ে ক্রীড়া কোটার অধীনে পুরুষ এবং মহিলাদের ২৪ টি পদের জন্য নিযুক্তির বিজ্ঞপ্তি প্রকাশ করেছে । ভারতীয় নাগরিক এবং যোগ্যতার সব মাপকাঠি পূর্ণ করা ক্রীড়া ক্ষেত্রের সঙ্গে জড়িত লোকেরা এই আবেদন দাখিল করতে পারবে । লেভেল এক থেকে লেভেল ৫ পর্যন্ত বিভিন্ন পদের জন্য নিযুক্তি প্রদান করা হবে । পদগুলোর জন্য আবেদনের শেষ দিন ৯ জুন ধার্য করা হয়েছে। ইচ্ছকু প্রার্থীরা www.nfr.indiaairways.gov.in ওয়েবসাইটের মাধ্যমে আবেদন করতে পারবে । ভারোত্তোলন , গলফ , বক্সিং , সাইক্লিং , ক্রিকেট , বেডমিন্টন , ফুটবল , টেবল টেনিস ইত্যাদি ক্রীড়া ক্ষেত্রের খেলোয়াড়রা এই পদগুলোর জন্য অনলাইনে আবেদন করতে পারবে । লেভেল চার এবং লেভেল পাঁচ পদে

আবেদনকারী প্রার্থীদের পয়লা জুলাই ২০২৪ এর মধ্যে ১৮ থেকে ২৫ বছর এবং লেভেল ১ , ২ এবং ৩ নম্বর পদের জন্য আবেদনকারী প্রার্থীদের নির্ধারিত বয়সের সময়সীমা চলতি বছরের পয়লা জানুয়ারী পর্যন্ত ১৮ থেকে ২৫ বছরের মধ্যে হতে হবে। উত্তরপূর্ব সীমান্ত রেলওয়ে আন্তর্জাতিক মানের খেলোয়াড় সনাক্ত করে তাদের ক্রীড়া প্রতিভা বিকশিত করে তোলার জন্য এই সুযোগ প্রদান করছে।

রাজ্যের বিভিন্ন সত্র নামঘরে আজ মহাপুরুষ শ্রী শ্রী মাধবদেবের ৫৩৫ তম আবির্ভাব তিথি উপলক্ষ্যে বিভিন্ন কার্যসূচী পালন করা হয়। এরমধ্যে উল্লেখযোগ্য স্থানগুলি হলো মহাপুরুষ মাধবদেব স্থাপিত বরপেটার সুন্দরীদিয়া সত্র, যোরহাট জেলার ঢেকীয়াখোয়া বরনামঘর, গোলাঘাট জেলার আটখেলিয়া নামঘর, মরিগাঁও জেলার বরদল পালনাম থানে ইত্যাদি। নানা কার্যসূচীর মধ্যে ছিলো নামকীর্তন, আলোচনা সভা, অখন্ড পালনাম, সাংস্কৃতিক অনুষ্ঠান ইত্যাদি।

ন্যাশনেল টেষ্টিং এজেন্সির পক্ষ থেকে গতকাল এক বিজ্ঞপ্তিতে জানানো হয়েছে যে সি ইউ ই টি-র স্নাতক স্তরের পরীক্ষার বাংলা ও পরিবেশ বিজ্ঞান বিষয়ের পরীক্ষা আগামী ২৯শে মে শিলচরে অনুষ্ঠিত হবে। বিশদ বিবরণের জন্য ছাত্র-ছাত্রীরা ০১১-৪০৭৫৯০০০ বা cuets-ug@nta.ac.in এই মেইলে যোগাযোগ করতে পারবে।

ছাত্র সংগঠন এ আই ডি এস ও-র কাছাড়-করিমগঞ্জ ও হাইলাকান্দি জেলা কমিটির পক্ষ থেকে আসাম বিশ্ববিদ্যালয়ের সিদ্ধান্ত অনুসারে ৮০ শতাংশ আসনে সি ইউ ই টি পরীক্ষার ফলাফল ছাড়া ছাত্র-ছাত্রীদের ভর্তির যে সিদ্ধান্ত গ্রহণ করা হয়েছে, সেবিষয়ে ছাত্র সংগঠনের পক্ষ থেকে রাজ্যের উচ্চ শিক্ষা বিভাগকে অবিলম্বে সিদ্ধান্ত গ্রহণের দাবী জানানো হয়েছে।

বরাক উপত্যকার তিন জেলা সহ রাজ্যের অধিকাংশ জেলায় গরমের প্রকোপ বৃদ্ধি পাওয়ায় জনসাধারণের দৈনন্দিন কাজকর্মে ব্যাপক প্রভাব পরিলক্ষিত হয়েছে। শিলচর সহ রাজ্যের বেশ কয়েকটি স্থানে তাপমাত্রা ৩৮ ডিগ্রী অতিক্রম করেছে। অতিরিক্ত গরমের ফলে বহু লোক বিভিন্ন রোগে আক্রান্ত হয়েছেন। বিশেষ করে ছাত্র ছাত্রীরা শারিরিক কষ্ট সহ বিভিন্ন অসুবিধার সম্মুখীন হচ্ছে।

এই পরিস্থিতির মধ্যে গৌহাটীর আঞ্চলিক আবহাওয়া বিজ্ঞান কেন্দ্র আজ রাজ্যের বিভিন্ন স্থানে হালকা থেকে মাঝারী বৃষ্টিপাত এবং বজ্রপাতের সম্ভাবনা রয়েছে বলে জানিয়েছে। এদিকে আগামী রবিবার ও সোমবার রাজ্যের দু-একটি স্থানে ঘন্টায় ৩০ থেকে ৪০ কিলোমিটার বেগে ঝড় ও বৃষ্টিপাত হবার সম্ভাবনা রয়েছে বলে আবহাওয়া বিজ্ঞান কেন্দ্র পূর্বাভাসে জানিয়েছে।

বেসরকারী স্বেচ্ছাসেবী সংস্থা ইয়াসির পক্ষ থেকে বরাক উপত্যকা ছাত্র-ছাত্রীদের প্রচণ্ড গরমের হাত থেকে রক্ষা দিতে শিক্ষা প্রতিষ্ঠানে পাঠদানের সময়সূচী পরিবর্তনের দাবী জানানো হয়েছে। সংস্থার পক্ষ থেকে বরাক উপত্যকার তিন জেলার জেলা আয়ুক্তদের কাছে তাপ প্রবাহ না কমা পর্য্যন্ত শিক্ষা প্রতিষ্ঠানের সময়সূচী পরিবর্তনের দাবী জানানো হয়েছে।

হাইলাকান্দীর শেফালিকা রায় স্মৃতি মাতৃভাষা আর্দশ বিদ্যাপীঠের উদ্যোগে আজ বিশ্বকবি রবীন্দ্র নাথ ঠাকুরের ১৬৩তম ও বিদ্রোহী কবি কাজী নজরুল ইসলামের ১২৫তম জন্ম বার্ষিকী যথাযোগ্য মর্যাদায় পালন করা হয়। স্কুল অধ্যক্ষ কৈনাতম্বী সিংহের পৌরহিত্যে এ দিন প্রথমে রবীন্দ্রনাথ ঠাকুর ও নজরুল ইসলামের প্রতিকৃতিতে শ্রদ্ধা নিবেদন করা হয়। পরে ছাত্র-ছাত্রীরা সাংস্কৃতিক অনুষ্ঠান পরিবেশন করে।

এদিকে বদরপুরের সেন্ট্রাল পাবলিক স্কুলেও ছাত্র-ছাত্রীদের সাংস্কৃতিক পরিবেশনায় আজ বিদ্রোহী কবি কাজী নজরুল ইসলামের জন্ম বার্ষিকী পালন করা হয়।

করিমগঞ্জ স্বাস্থ্য বিভাগের উদ্যোগে গণসচেতনতা বৃদ্ধির উদ্দেশ্যে বিভিন্ন কার্যসূচীর মধ্য দিয়ে আজ বিশ্ব সিজোফ্রেনিয়া দিবস পালন করা হয়েছে। এ উপলক্ষ্যে আজ সকালে করিমগঞ্জ সিভিল হাসপাতাল থেকে একটি র্যালী বের হয়ে শহর পরিক্রমা করে। পরে ডক্টর সপ্তর্ষি পাল চৌধুরীর পৌরহিত্যে আয়োজিত সভায় ডক্টর মেঘা চ্যাটার্জি, সমাজকর্মী সুস্মিতা দাস প্রমুখ বক্তারা সিজোফ্রেনিয়ায় আক্রান্ত ব্যক্তিদের জীবনে সম্প্রদায়ের সর্মথন এবং বোঝাপড়ার গুরুত্ব নিয়ে আলোচনা করেন। এছাড়া আলোচনা সভায় সিজোফ্রেনিয়ার লক্ষণ, কারন এবং চিকিৎসার বিকল্প সম্পর্কে অবগত করানো হয়েছে। উল্লেখ্য এবছরের বিশ্ব সিজোফ্রেনিয়া দিবসের বিষয় হচ্ছে-সম্প্রদায়ের উদারতার শক্তি উদযাপন।
